

東

華

錄

東華錄

康熙五十二

臣王先謙敬編

臣周潤蕃恭校

秋七月癸丑予故理藩院左侍郎文達原任山西巡撫葉穆濟祭葬○丙寅以常書爲倉場侍郎由內閣學士遷○是月免山西忻介休等十三州縣水災額賦有差

八月甲戌諭戶部廣西四川貴州雲南俱屬邊地土壤磽瘠民生艱苦歷歲以來屢施恩恤茲念育民之道無如寬賦矧邊省地方非再沛優恤之恩則閭閻無由充裕所有康熙三十三年四省應徵地丁銀米著通行蠲免以稱朕加惠遠省民生至意○己卯以常綬爲內閣學士由中郎遷○辛巳內閣學士王尹方奏請終養允之

○癸未 上巡幸塞外啟鑾○丁酉以顧藻爲內閣學士由兵部督補右

理事

官遷○己亥

上次席北畢喇賜喀爾喀科爾沁等諸王以下及

內大臣侍衛都統部院大臣及八旗官兵宴賜隨圍喀喇沁塔布囊以下及官兵冠服銀幣○免山西忻介休等八州縣水災額賦有差

九月丁未分四川陝西督標火器營兵二千名爲左右二營添守備一分轄每營各設千總二把總四○命修盛京城○己酉昭武將軍郎談奏見擒哈密回子云噶爾丹屬裔牛羊已盡捕魚爲生噶爾丹在烏郎塢耕種臣意將馬秣肥來春直臨和卜多索其同哈密國人戕害使臣之土克齊哈什哈哈爾海達顏額爾克等彼旣起釁當乘機而行噶爾丹如不迎敵遁入深林則窮追之卽不獲其身而散其族屬誤其農田大兵回經哈密殺散噶爾丹供賦之回子川其禾苗毀噶爾丹所恃以爲常產者彼自窮困矣奏至

命議政王大臣會議尋議前噶爾丹戰於烏闌布通退回之時誓不復擾我邊境近以欽差頒賞員外郎馬迪等被害噶爾丹不及與知乃其種類所爲已遣使請罪蒙上寬宥賜以敕書目下噶爾丹並無偏近邊塞之覺將軍郎談所奏應無庸議但檄將軍郎談孫思克遣才能者遠行偵探如獲噶爾丹實音具奏請旨其見擒哈密八人令將軍給以糗糧遣歸得旨此事所關甚大郎談等身在行間必有所見進則易於奏功亦未可定儻有可乘之便此機亦不可失茲軍行之期尙早當遣護軍統領蘇丹侍郎席爾達會同總督佛倫往與郎談博齊孫思克等將可進不可進與當進當守之事詳議回奏尋蘇丹等往以郎談等所議回奏命王大臣會議尋議聞噶爾丹有離和卜多之信且目下噶爾丹人力單薄馬畜鮮少斷不與大兵抗拒今率兵征勦糧餉關繫重大噶爾丹

遊牧爲生無一定之巢穴所請來春直臨和卜多之奏宜罷之哈
密回子向來納賦於噶爾丹等蒙古歷有年所非自今初始也蓋
此等蒙古多有納賦之番人今以納賦於噶爾丹之故遽興兵擊
散非所以仰體 皇上如天好生之至仁也既議罷征噶爾丹則
所稱殺散哈密回子刈其禾苗之語當不必議但將噶爾丹之事
付將軍孫思克遣綠旗材幹人員不時遠探聲息其回子八人禁
在甘州哈密者乃諸使之通衢也宜令放歸併將 皇上好生至
德大書告示付此回子等持往諭其頭目仍給此回子等糧騎從
之○癸丑 上次森濟圖哈達昂阿賜喀爾喀澤卜尊丹巴胡土
克圖土謝圖汗諸王貝勒台吉喇嘛等冠服弓矢幣帛○丙辰賜
喀爾喀郡王崑都崙博碩克圖滾布等冠服鞞帶等物有差○丁
巳護軍統領蘇丹等奏臣等查甘州涼州在西北陲所植之苗惟

麥黍豌豆而已甘州所屬雖畧種稻而不甚多大兵在甘州糧草不足乞令自京撥駐甘涼之大兵暫駐甯夏駐紮蘭州之西安兵暫駐蘭州其西安調自督標官兵發回省城西安官兵既皆在蘭州則西安將軍博霖應遣往蘭州從之○庚申 上次巴達噶喇賜翁牛特協理旗務台吉以下及隨圍官兵弓矢冠服銀幣○丙寅琉球國中山王尙貞貢方物並請入監讀書官生梁成楫等歸國宴賚如例○丁卯 上還京師○盛京刑部侍郎明額禮以老病乞休允之○己巳諭大學士等願入代因在內廷供奉多年屢次擢用以至尙書今觀其人不宜留任部院著革去尙書以伊世職隨旗行走○庚午發蒙古兵三千駐右衛○是月免山西太原文水等四縣水災湖廣蘄黃岡等十州縣衛江西甯州上饒縣旱災額賦有差

冬十月辛未朔調楊廷耀爲福建布政使以喻成龍爲山東布政

使由按察使遷

○壬申諭大學士等給事中彭鵬參今科順天鄉試疏

內有請朕親審將主考同考官並舉人一一窮究之語是謂諸大

臣皆不可信矣若倚任之大臣既不可信雖彭鵬亦可信乎況治

天下不在拘執小節當敦崇大體以和平御之如大小事皆朕一

人親審則庶務何由畢理且自古以來亦無此體卽依彭鵬所奏

將徐倬等親問必將刑具取入宮內刑具乃不得已而用者朕亦

何忍見之彭鵬既係言官當勸朕寬大和平乃請親行刑訊朕實

不解也著九卿議奏○諭前尚書科爾坤諳練事務在戶部時著

有勤勞被參之事殊不明晰以其年邁不復任用可復尙書銜○

以佛葆爲盛京刑部侍郎

由左副都御史遷

○甲戌調沙穆哈爲禮部尙

書由工部調

○乙亥

上御經筵

○丙子

上以闕里

聖廟落成命

皇三子允祉 皇四子前往致祭 御製重修闕里孔子廟碑

曰朕惟大道昭垂堯舜啟中天之聖禹湯文武紹危微精一之傳
治功以成道法斯著至孔子雖不得位而贊修刪定闡精義於六
經祖述憲章會眾理於一貫爲往聖繼絕學爲萬世正人心使堯
舜禹湯文武之道燦然丕著於宇宙與天地無終極焉誠哉先賢
所稱自生民以來未有盛於孔子者也往歲甲子朕巡省東方躬
詣闕里登聖人之堂祇將祀事觀其車服禮器金石絃歌蓋徘徊
久之不能去焉顧聖廟多歷年所丹雘改色榱桷漸圯用是惻然
於心特發內帑專官往董其役鳩工庀材重加葺治經始於辛未
之夏事竣於壬申之秋廟貌一新觀瞻以肅蓋深惟孔子之道垂
範古今朕願學之志時切於懷每考天人性道之原修齊治平之
要思以遠紹前緒牖迪生民凡所以尊崇寢顯者靡不隆禮竭誠

以將景行仰止至意而況廟庭之地尤爲聖人神明所憑依者哉
今者登堂而陳俎豆入室而習禮儀營構旣堅采章彌煥庶幾於
朕心深有慰焉用是特遣皇子允祉貼黃敬展禋祀以告落成凡
我臣民瞻仰宮牆倍增嚴翼尙益思敦崇德義砥礪倫常以不負
朕尊師重道之意豈不休歟因勒貞石繫以辭曰麟書啟瑞素王
挺生上律下襲玉振金聲範圍百代陶甄萬類道備春秋德參天
地立型垂訓師道昭宣象懸七曜海納百川曩巡東魯臨河登岱
峩峩尼山夔牆斯在虔恭展謁至德是欽宗風溥博教澤闕深洙
泗之陽殿寢翼翼上棟下宇神靈安宅冬官特飭締造維新宏規
大啟肅奉明禋聖人之居永以觀德千載傳心四方式則○丁丑
予故倉場侍郎伊圖祭葬○己卯以薩穆哈爲工部尙書由步軍
總尉遷
○諭大學士等聞山東今年田收之後九月中蝗螟叢生必已遺

種於田今歲雨水連綿來春少旱蝗則復生未可知也先事豫圖可不爲之計歟宜命戶部速檄直隸山東河南山西陝西郡縣於今歲來春勉力耕耨田畝蝗螟之災務令消滅若郡縣有不能盡

其田者蝗或更生必力爲捕滅毋使爲吾民患○以張勅爲山東

按察使

原任福建按察使

○庚辰諭大學士等陝西西安鳳翔二府連被

災傷朕多方賑救然後化離之民漸還鄉井今歲雖雨澤霑足百

穀阜成而人民甫脫飢寒未饒生計若明歲應徵錢糧卽令輸納

慮閭閻儲蓄終難充裕西鳳二府屬被災州縣衛所康熙三十三

年糧米照舊徵收外其地丁銀兩著通與蠲免稱朕愛養休息至

意○辛巳諭大學士等甯夏地方最爲緊要總兵官馮德昌趙良

棟劾其扣剋軍糧馬匹倒斃馮德昌著解任此員缺以登州總兵

官王化行調補○壬午以沙哈里爲左副都御史

由盛京刑部理事官遷

○

丁亥設高家堰通判一中河通判一移揚河通判於高郵州瓜州儀真河道開座事務歸江防同知專管鎮江府屬丹徒丹陽二縣河道以各該縣縣丞專管令該府通判兼理○庚寅九卿遵旨議覆給事中彭鵬參順天鄉試主考徐倬等奏內語涉狂妄不敬應革職 上諭大學士等是科鄉試若言有弊事無顯露若言無弊物論紛紛徐倬學問素優開列試官奏內並無其名朕令通行開列將伊點出本日卽入貢院似乎無暇縱難言全無一二通關節者若云皆係屬託作弊則所取百有餘人屬託者必須數百人頃刻間何暇徧通關節作弊也彭鵬有在朕前講論文章之語既係言職使盡其意可耳彭鵬又請照原卷刊刻頒行朕意亦以爲是凡試官豈有不顧名節之理照原卷刊刻頒行天下則文章之優劣自不掩試官亦知儆戒矣向日徐乾學高士奇王鴻緒爲言官

參奏朕令休致回籍彭鵬係言官從寬免其革職○壬辰 上大

閱於玉泉山○甲午 上還宮○丙申命彰德府同知專管彰德

府河務廟灣同知兼管鹽城海州河務以直隸清河故城江南沛

縣河道歸併東省道員兼轄德州河南河道歸上河通判管轄○

丁酉鄂羅斯察漢汗遣使進貢大學士等將鄂羅斯進貢奏章翻

譯進呈 上曰鄂羅斯國人材頗健但其性偏執論理亦多膠滯

從古未通中國其國距京師甚遠然從陸路可直達彼處自嘉峪

關行十一二日至哈密自哈密行十二三日至吐魯番吐魯番有

五種部落過吐魯番卽鄂羅斯之境聞其國遼闊有二萬餘里漢

時張騫曾出使西域或卽彼處地方明永樂曾經出塞彼時以爲

甚遠按其所至之地離此亦不過千餘里史書所載霍去病曾出

塞五千里想或有之今塞外尙有碑記可考至外藩朝貢雖屬盛

事恐傳至後世未必不因此反生事端總之中國安甯則外費不作故當以培養元氣爲根本要務耳○是月免直隸順天保定等四府屬江南海州全椒等十州縣衛山西蒲州定襄等四州縣被災額賦有差

十一月庚子朔諭大學士等朕每日聽政必於辰刻中御門聞部院奏事大臣每日於黎明時齊集午門外久候方始入奏奏畢復各歸署理事無乃過勞朕觀大臣內有年及六旬者亦有六旬以上者此後於家中各進糜粥按時來奏亦不至遲誤大臣節勞養體亦可多爲朕效力數年爾等可將朕旨傳與部院大臣知之○辛丑 上奉 皇太后謁 陵啟鑿○贈故天津總兵官劉國軒太子少保子祭葬○乙巳 上奉 皇太后謁 暫安奉殿 孝陵至 仁孝皇后 孝昭皇后 孝懿皇后陵奠酒○癸丑雲南

貴州總督范承勳陛見 上諭爾係盛京舊人爾父兄累朝效力

爾兄又爲國盡節朕因見思及爾兄心爲慘切不見爾八九年矣

爾鬚髮遂皓白如此今因郊外寒冷將朕貂帽貂鞋白狐腋袍賜

爾此時更換恐受風寒可明日服之來謝恩○丁巳停今年決囚

○庚申 上奉 皇太后還京師○以郭渾爲甘肅布政使

原任山西布政使○甲子諭戶部頃者展謁 山陵沿途察訪民隱今歲雨水

過溢田禾歉收米價翔貴又聞順天河間保定永平四府所屬皆

然目前米價既貴將來春夏之際時值益昂小民必艱粒食順天

河間保定永平四府康熙三十三年應徵地丁銀米著通行蠲免

所有歷年舊欠悉與豁除務令人霑實惠以副朕子育黎元至意

○丙寅諭大學士等朕前謁 陵兵部侍郎舒恕隨從往往躲避

朕未常見且人材甚屬不及著解侍郎任前保舉司官時各部止

舉二三人督捕衙門司官甚少侍郎博際保舉幾及十員中有定

見之人豈如是乎觀博際舉止猥瑣全無大臣之體著降三級調

用○丁卯 皇子允禩生○戊辰以趙山爲督捕侍郎由副都統遷○

己巳撤蘭州兵駐西安○命河道總督于成龍來京○庚午以安

布祿爲兵部右侍郎由內閣學士遷調沈圖爲內閣學士由左副都御史遷○是

月免江南高郵等四州縣水災額賦有差

十二月辛未諭大學士伊桑阿等適都察院議處吏部誤議知府

盧騰龍等革職一事將堂官降三級司官降四級俱調用所議甚

當朕觀人之識見精神有限不能過其本來分量烏得無錯但自

知其錯卽宜承認若既知其錯而不承認希圖文飾則其錯彌甚

必致壞事前朕十三四歲輔政大臣理事時有誤行一事朕至今

猶憶之彼時遇頒恩赦釋放罪犯曾赦一不應赦之罪人該部以

不應赦而赦應否釋放請旨大學士李蔚奏欲將錯就錯朕問爾此言於此事尙可如遇不應正法之人誤行正法則人死豈能復生此言亦可乎李蔚不能對大學士圖海奏此事實臣等之錯有何辯處天下事惟人命至重朕察之又察然已行之事其中能保無誤耶○達賴喇嘛奏爲喀爾喀厄魯特事奉到敕旨並伊錫格隆所傳口諭聞之不勝歡忭諸凡蒙古奉貢天朝之國而厄魯特不聽訓誡近害敕使又噶爾丹博碩克圖汗以三事陳奏其見責於聖明極當但臣已年邁國事大半第巴主之已在睿照中卽第巴向亦仰體聖意實心任事目前見遵旨而行儻臣意有所未及力有所未到伏祈時頒訓諭又令伊錫格隆口奏云吾國之事皆第巴爲主乞皇上給印封之以爲光寵又第巴令口奏云願繳玉印乞給以金印得旨此事頗大著議政王大臣會議以

聞尋議達賴喇嘛自頒給冊印受封以來恭順職貢有年今以其身已老國事皆第巴主之乞封第巴授之印信以光寵之爲之懇請而第巴又戴 皇上恩眷誠心乞請金印應如所請又按此玉印乃明朝給闡化王之印今第巴既已繳還應付所司從之○壬申諭大學士等朕觀近日政務簡少每日啟奏部院大臣中有年邁者甚屬勞苦自後年六旬以外大臣令其量力間二三日一來啟奏至折本內遇緊要事朕有旨傳進爾等方來請旨若無朕旨爾等將折本彙齊亦間二三日一來啟奏○癸酉諭掌院學士傅繼祖等翰林院衙門甚屬緊要凡翰林官每日作文寫字誦習講究是其分內之事各宜勤勉以盡職掌若有結交不肖牽引妄行遇學差缺出恣爲奔競營求者不時訪參○先是廣東巡撫江有良巡視兩廣鹽課太常寺少卿沙拜彼此互參奉旨著江南江西

總督傅拉塔福建

浙江總督朱宏祚會審具奏至是傅拉塔等查

審巡視兩廣鹽課

沙拜誣參布政使張績得解費銀一萬四千餘

兩應革職巡撫江有良阻壞鹽法亦應革職得旨吏刑二部會同

覈議具奏○丁亥

上幸南苑行圍○戊子山西巡撫噶爾圖奏

輓運湖灘河朔米石應否暫行停止得旨今陝西米石充足此米

若仍輓運必致勞民朕問總督佛倫亦云輓運湖灘河朔米石百

姓勞苦此所運之米令其停止將船隻送至歸化城等處加意收

管○諭兵部本朝滿洲官兵從來精銳驍勇遇寇必克所向無敵

前厄魯特噶爾丹之役官兵不能悉體朕意卽行勦滅致失機會

罔奏膚功朕心爲之不懌故比年以來簡閱官兵歲凡兩舉朕躬

臨指示訓誨頃閱武時見諸士卒行列整齊隊伍明晰進退嫻熟

嚴肅無譁所有軍令無不遵守該管官員號令約束既嚴且善此

皆官兵協志同心各加奮勵所致朕心深爲嘉悅八旗前鋒護軍撥什庫驍騎兵等各賞給一月錢糧無職掌官照護軍給一月錢糧火器驍騎兵等亦照護軍賞給有管轄職掌官悉賞給內庫段疋其賞賜段疋戶部會同總管內務府衙門議奏這次閱武時官員內有降級罰俸者俱准開復以示朕體恤將士申明賞罰之至意至八旗步軍官兵有察緝盜賊巡理道路等役甚多極爲勞苦步軍亦各賞給一月錢糧管步軍官亦各賞給段疋獎勵恤勞用稱朕意○己丑吏部刑部議覆江南江西總督傅拉塔等審廣東巡撫江有良巡鹽少卿沙拜互參一案均擬革職應如所奏得旨江有良巡撫安徽居官不善調補廣東聲名又劣沙拜爲人輕佻狂妄俱革職○以田雯爲刑部右侍郎原任貴州巡撫○先是上諭理藩院聞喀爾喀公西卜退哈坦巴圖爾納木扎爾陀音扎薩克台

吉阿里雅阿爾薩蘭衛寨桑等自克魯倫前徙已至俄爾渾圖喇
矣其和托輝特之根敦戴青不與眾喀爾喀同來在巴稜額地方
今厄魯特未必不動而若輩不知遊行牧放恐猝遇厄魯特可著
尙書班迪往諭根敦戴青並西卜退哈坦巴圖爾等俱令內移不
得越克魯倫巴顏烏闌遊牧未行根敦戴青使至得旨根敦戴青
既有使來應發檄付來使攜歸著理藩院議奏尋議喀爾喀和托
輝特根敦戴青奏未年扎爾布柰扎薩克圖汗等使臣繼臣伯之
缺置之右翼寅年噶爾丹西勒圖澤卜尊丹巴胡土克圖理藩院
尙書喀爾喀兩汗授臣爲扎薩克卯年與濟喇克衛徵哈什哈交
戰敗之巳年與車臣諾顏交戰敗之往禦噶爾丹雖不之值會殺
察罕台吉以及眾兵與厄魯坤交戰擊斬諾木齊台吉以及眾兵
與厄魯坤陀音之子扎郎阿伊爾扎海台吉等叛還復擊而取之

其他族類及我屬裔併眾饑人俱已收集我部落叛入鄂羅斯者亦擒取以歸緣歷年征伐是以有誤請安查庫倫白爾齊爾之地原任尚書阿哈尼等前此會閱曾授根敦戴青爲扎薩克今根敦戴青未來其扎薩克之處姑不議俟彼親至應授何秩安插何地另議奏聞來使達爾漢諾顏塔布囊言根敦戴青在杭愛今既誠心遣使請安進貢當移文諭之其文畧曰前者眾喀爾喀窮困來降 皇帝受之俱依品級加封編爲旗分佐領撥給地方使各得其所矣惟爾根敦戴青獨留在後 聖上聞之常念爾近厄魯特游牧恐爲彼所侵害特將此故遣大臣諭爾已皆點出今達爾漢諾顏塔布囊至以爾疏陳奏 聖主方知爾與車臣諾顏交戰塔禦噶爾丹擊殺察罕台吉巴爾坤等征討諾木齊台吉等之事大加獎許今爾仍在杭愛游牧不知有厄魯特侵害可慮之事否是

以檄爾或爾仍在杭愛並無可虞或卽欲內遷可速備文來報且爾既誠心奉貢似宜親來請 皇上起居我等職在所司特檄諭

爾此文應用臣衙門印信令來使齋往又聞公西卜退哈坦巴圖爾等在土喇等地方土喇乃厄魯特行路若無妨礙宜各於遊牧之地遠設偵探加意防禦臣等亦備印文諭之奏入從之○辛卯卹贈死事理藩院員外郎馬迪世職○甲午 上還宮○是月免

湖廣興國等四州縣旱災江南清河等三州縣浙江餘姚等三縣山西河津等二縣水災額賦○是歲朝鮮琉球來貢○人丁戶口

二千三十六萬五千七百八十三田地山蕩畦地五百九十七萬三千四百五十六頃三十四畝有奇徵銀二千七百三十八萬五千六百三十一兩有奇草二百八萬一千八百七十三束茶十五萬七千四百五十三引行鹽四百三十三萬三千四百三十引徵

課銀二百六十九萬七千一百六十三兩有奇鑄錢二萬八千九百九十五萬八千六百七十有奇

東華錄

康熙五十三

臣王先謙敬編

臣周倫蕃恭校

康熙三十三年甲戌春正月乙卯 上以盛京年歲歉收命戶部
尚書馬齊馳驛前往以倉穀支給兵丁○丙辰九卿議覆河道總
督于成龍條奏修築黃運兩河應增設河道官員豁免民夫等事
俱不准行于成龍明知難行之事故爲條奏非大臣實心任事之
義應革職 上諭大學士等凡爲臣者須行實事不當沽取虛名
于成龍奏稱豁免民夫夫河道工程浩繁能不用民夫而可以集
事乎且河道增設一官則民間多一事見在所設官員歷年以來
料理工程並無違誤之處總之河工經理唯在得人不在增設官
員也隨召于成龍問曰爾向日議河工事曾面奏減水壩宜塞不

宜開汝今觀減水壩果可塞乎于成龍奏曰臣彼時妄言減水壩
宜塞於今觀之實不可塞 上曰爾前言靳輔糜費錢糧並未盡
心修築河工爾今觀之何如于成龍奏曰臣今亦照靳輔所修而
行如果修築不善去年大水安能不致潰壞臣見去年大水不勝
畏懼故請增修 上曰既如此則爾所奏之非靳輔所行之是何
以不明白陳奏爾排陷他人則易身任總河則難此非明驗耶又
諭大學士等曰于成龍曾奏河道兩岸未見靳輔栽有柳樹朕巡
歷南方指河干之柳問之無辭以對又奏靳輔放水以淹民田百
姓苦累朕問從何處放水所淹者何處之田奏曰臣未曾親見原
是侍郎開音布管理下河工程時曾奏參開官開高郵州南減水
閘放水衝淹民間麥田朕後至其地觀之開閘洩水斷不致淹害
麥田及問開音布所開何閘致淹麥田亦無辭以對此不過附會

于成龍之說耳且未見栽柳董訥亦曾言之王隲董訥李應薦係山東人皆畏懼于成龍于成龍任直隸巡撫時居官好亦曾效力但爲人膽大凡事必欲取勝其所奏之事止徇人情面欲令人感彼私恩夫擢用人材乃朝廷之大權非爲臣者市恩沽名所可擅行之事也至于成龍條奏內修理通州天津一帶河道及培修高家堰隄亦有當酌議處高堰保淮敵黃甚爲緊要此處稍有疏虞則淮安一帶州縣居民田廬皆受水害此本再詳議具奏○命發山東穀石海運至盛京以濟軍民○己未九卿議覆河道總督于成龍奏高家堰等工程作何修築之處應令該督察明具奏 上召于成龍問曰如爾所奏興工修築今年六月內能完工否于成龍奏曰卽今准行備辦料物亦需時日六月內斷不能完工 上曰是已過發水時矣有何益乎諭大學士等曰于成龍面奏雲梯

關以下至海口因水勢散漫以致沙漸淤長朕思海口爲黃河入海之路海水勢迅急方能刷沙河水乃得順流此爲緊要所當急濬者也至於河南黃河隄岸單薄低矮處宜加培修此等處再詳議具奏○庚申振武將軍甘肅提督孫思克奏蒙古頭目博濟聞伊兄巴圖爾額爾克濟農投降蒙恩安插甯夏賀蘭山今亦率其屬下男婦一百一十餘人來降求與伊兄同居 上命理藩院遣官一員送博濟等至巴圖爾額爾克濟農所令其完聚○辛酉諭大學士等學政關係人材甚屬緊要朕觀原任御史陸隴其學問優長操守甚善直隸守道邵嗣堯於煩劇之事未見其長而操守學問俱優若以此等有操守之人補授必能秉公校士革除積弊有裨學政○壬戌子故盛京戶部侍郎莽色祭葬○甲子九卿議覆河道總督于成龍於河工事宜妄行陳奏前後互異應革職

枷賣其河南黃河險工應令接任總督察明具奏得旨此事應照

九卿所議行但于成龍修河之事未完著革職留任帶罪圖功○

調高承爵爲廣東巡撫

由安

○乙丑諭大學士等四川陝西總督

佛倫請修黃城爾舊城朕覽其所進地圖黃城爾地方實屬緊要
自甘州至西甯道里遙遠若自黃城爾至西甯其路甚近三日可
達令官兵駐防甚爲有益青海居住台吉等曾以爲此地乃伊等
地方懇請給還朕親政時諭輔政諸臣此係大草灘地方於我朝
最爲要地斷不可給故至今隸我版圖凡遣往西邊官員復命者
朕常詢問地方情勢亦嘗詳閱輿圖故於邊疆要地無不記憶此
處駐防兵丁事屬緊要著該督會同提督確議具奏○九卿議覆
四川陝西總督佛倫奏臣奉旨查閱三邊查陝西自肅鎮嘉峪關
北邊以至甯夏賀蘭山起處俱係土築邊牆自賀蘭山之勝金關

起至賀蘭山盡之平羅營原無邊牆以山爲界自平羅營以至延綏汎地之黃甫川亦係土築邊牆至於甘肅涼莊一帶南山原無邊牆俱係剷山掘壕爲陡崖作界其間陡崖壕塹甚多殘缺又肅甘涼等處南山及甯夏之賀蘭山隘口原有石壘木柵堵塞年久倒廢人可越度又西甯鎮汎之西石碇鎮海西川一帶原有邊牆其南山直抵河州北山直抵莊浪原無邊牆皆係剷山爲界亦有年久倒頽可以越度者或平坦無迹者三邊牆垣歷年久遠坍塌已多若不亟爲修理必致倒廢但三邊遙遠不能剋期修理勒限完工請於明年漸次修補令提鎮及專城之副將參將遊擊等量給步戰守兵工食督其修理各隘口應堵石壘木柵之處亦令提鎮等酌量堵塞其倒壞邊牆沙淤壕塹應令兵丁修完從之

二月庚午兵部奏順承郡王下散騎郎員缺開列擬正擬陪人員

請補 上曰王年幼左右宜用老成此散騎郎擬正之人與今日引見補授護衛之人皆童穉耳少年相聚何以導王爲善都統希福歷官已久係所屬大臣可召來切責其補授散騎郎護衛二本俱發回另行揀選具奏○辛未 上御經筵○壬申諭大學士等設立科道官員特爲條奏政事今觀都御史以至科道條奏者甚少閒有條奏者每存私意或將不睦之人欲行傾陷則託辭參奏此等情弊朕豈不知嗣後科道官員各宜端其心術以有益國家之事條奏爾等可將此旨傳諭○以佟國佐爲安徽巡撫由布政使遷○甲戌以興永朝爲副都統王樑爲漕運總督由湖南巡撫遷○以李煒爲安徽布政使原任湖北布政使○庚辰 上巡幸畿甸啟鑾○甲申諭大學士等朕巡視所至見運河及渾河決口民田淹沒甚爲可憫著直隸巡撫郭世隆天津總兵李鎮鼎會同倉場侍郎常書自通

州至西沽兩邊隄岸再自西沽至霸州決口宜修之處閱視明白
速行修築○丁亥諭大學士等通州倉米平價發糶米價頓減於
民大有裨益又沿河一帶州縣已截留山東漕運糶與百姓誠恐
不肖地方官員或增價發糶或糶與販賣之人以致百姓不霑實
惠著巡撫郭世隆不時巡察○以董安國爲湖南巡撫石文晟爲
貴州布政使由山西平陽府知府遷○移山西大同府同知駐右衛管駐防
兵餉增倉庫大使各一

三月壬辰諭大學士等朕前諭于成龍條奏河工事曾言王隲董
訥李應薦畏懼于成龍伊等奉如此嚴旨至今不行具奏引罪辭
職俯首戀位全無廉恥爾等可召集九卿將此宣示王隲董訥李
應薦等○丙午戶部尚書王隲內閣學士李應薦各具奏引罪祈
賜罷斥下部察議○丁未諭大學士等禮部奏祭 奉先殿儀注

將皇太子拜褥設置檻內朕諭尙書沙穆哈曰皇太子拜褥應設檻外沙穆哈卽奏請朕旨記於檔案是何意見著交該部嚴加議處尋議尙書沙穆哈應革職交刑部侍郎席爾達多奇均應革職得旨沙穆哈著革職免交刑部席爾達多奇俱從寬免革職○左都御史董訥具奏引罪得旨大臣引咎自陳應據實明白具奏若支飾含糊卽非臣誼董訥署理河道總督事時極言靳輔虛糜錢糧治河不善明係附和于成龍排陷靳輔今修築河工成效已著是非公罪定論昭然前會議河工事務時朕已面加嚴責董訥不卽具奏引罪頃傳諭詰問始行陳奏乃復不將依附于成龍之處從實直陳虛詞粉飾冀掩眾人耳目殊乖大臣之體該部察議具奏○兵部奏鑲黃旗佐領阿喇尼以老病乞休應令其照佐領品級解任得旨阿喇尼自任用以來黽勉效力奉差往察汎界時所

統原非滿兵皆係喀爾喀人湊成隊伍以致失事今年已老邁著復還原尚書品級解任○甲寅諭大學士等進士選取庶吉士教習讀書所以造育人材備他日之用司教習者理宜嚴加督課使之勤勉嚮學今考試庶吉士觀其所學甚劣較曩時庶吉士迥然不及此皆傅繼祖等教習怠弛不專心致志之所致也傅繼祖等交吏部嚴察具奏尋議覆傅繼祖張英教習不嚴均應革職得旨傅繼祖降三級調用張英降三級留任○左副都御史碩羅以老病乞休得旨碩羅升授副都御史之後並無建白著以郎中品級休致○乙卯以佛倫爲禮部尚書仍理四川陝西總督事○戊午吏部議覆戶部尚書王隲左都御史董訥內閣學士李應薦俱附和于成龍董訥自行陳奏又巧爲掩飾應將王隲董訥李應薦俱革職得旨王隲從寬免革職著以原品休致董訥李應薦俱著革

職○庚申 上御乾清宮親定殿試貢士甲第諭大學士等通曉

政事甚屬不易卽如賑濟一事朕親訪聞被災地方百姓一遇賑濟則盈千萬人聚而就食若不得其人不得其法反致生事諸貢士策中論吏治皆言當實心任事大法小廉今言官建白甚少聞有上奏者皆懷私心或所言似公實則假公濟私耳至督撫赴任時在京官員有親友門生在屬下者必相請託卽欲參劾不得不顧情面如果外而督撫內而言官皆從公據實參奏則不肖之吏自無所容今諸生對策雖能言之若身當其任恐亦能言不能行也○辛酉賜胡任輿等一百六十八人進士及第出身有差○諭戶部山西平陽府澤州沁州所屬地方前因蝗旱災傷已經蠲免額賦並加賑濟其康熙三十年三十一年未完地丁錢糧及借賑銀米若仍令帶徵剋期完納誠恐閭閻力絀益致艱難著將所欠

錢糧五十八萬一千六百餘兩米豆二萬八千五百八十餘石通

行蠲豁用紓民力○癸亥以傅德爲左副都御史由翰林院侍講學士遷○

乙丑以范承勳爲左都御史由雲南貴州總督遷○丙寅以田喜霖爲內閣

學士原任○丁卯諭大學士等山東巡撫桑額奏所屬積貯米穀並

無虧空此前任撫臣佛倫奉行之善也朕巡幸霸州時聞大城縣

知縣祖延泰散穀賑濟或有富戶冒稱饑民者查出卽將其家所

積之穀散給貧民因此並無假冒貧民得霑實惠是則奉行之善

存乎其人從前總督張長庚屈盡美巡撫白苞純韓世琦等居官

不善不數年間子孫窮困由此觀之徒貽惡名此輩貪取者今安

在哉且居官果善其光榮自不待言如江南將軍博靈調西安將

軍起程之日兵民泣送屈盡美居官不善離任之時地方百姓皆

爲切齒居官善否舉朝之人及地方百姓自有公論豈能掩飾哉

夏四月己巳盛京禮部侍郎單璧以年老乞休允之○庚午理藩

院奏今歲編審外藩蒙古四十九旗人丁共二十二萬六千七百

有奇內除隸公主郡王王貝勒貝子公額駙台吉等三萬一千五

百九十六丁外餘十九萬四千六百七十餘丁三丁內著一丁披

甲應披六萬四千八百九十一甲下所司知之○壬申以艾肅爲

盛京禮部侍郎由光祿寺卿遷○戊寅調丁思孔爲雲南貴州總督由湖廣調

○己卯遣班迪等招撫和托輝特根敦戴青並偵噶爾丹○庚寅

刑部等衙門議覆民人高宏擢毆死伊兄高宏先應正法 上諭

大學士等此案原供內有高宏擢之父高昇因伊子高宏先暴惡

先行砍害之語今悉刪去但希旨苟且定議人命關繫重大卽使

旨意未當亦宜據理執奏况議此案者止滿洲官一員漢軍官一

員似此關繫人命事情不多令司官詳察會議苟且結案可乎將

刑部官員嚴加申飭嗣後儻仍蹈前轍決不輕恕○辛卯以吳璵

爲湖廣總督

原任湖廣巡撫

○癸巳諭吏部前因靳輔年老遣順天府

丞徐廷璽佐理河務今于成龍奏稱徐廷璽於河務未諳在彼無

事著徐廷璽來京○甲午以劉暄爲安徽按察使

由直隸守道遷

○丁酉

予故原任內閣學士王尹方祭葬

五月戊寅朔工部以天壇一帶挑沙鋪路給過工價繕摺呈覽

步軍統領凱音布奏曰新修之路聽人照常行走不久又壞應派

綠旗兵看守令來往之人止走兩旁勿行中路上曰如此禁約

殊於朕意不合蓋修葺道路者專以便民也派兵看守不許行走

則修之何用若云禁行中路則看守之人必並禁及兩旁殊於行

人不便仍聽人照常行走後若毀壞令步兵稍稍葺治○安北將

軍伯費揚古奏噶爾丹使人納木喀喇克巴喇木扎木巴喇嘛等

率二千餘人稱請安進貢臣卽遣發官兵迎問實情據噶爾丹使人言我等實來請 皇上萬安查其人數則有男子五百餘婦女僮僕千餘 上曰噶爾丹使人著止歸化城遣滿丕往諭之曰爾等陽爲修好潛留人爲細作各處窺探是以止爾等於歸化城問爾來意視爾奏章再議其前此流寓歸化城有納奏和碩齊等皆橫行不法著交與來使○九卿議覆給事中彭鵬奏參提督順天學政兵部右侍郎李光地母故貪戀視位不請終制應將李光地解任不准回籍在京守制從之○癸卯諭大學士等國家以用人爲要或有知其人可用而避嫌不舉者或有明知其人不善而引爲黨援者自今九卿當各將所知居官賢能者敬慎公舉科道官職司耳目誠能於所知賢者從公推薦不肖者立行參劾則賢者勸而不肖者懲治道豈不美乎可將此旨傳諭九卿科道○甲辰

諭禮部尚書兼管翰林院掌院學士事張英翰林院係文學親近之臣向因日講時時進見可以察其言語舉止近日進見稀少講官侍班不過頃刻豈能深悉著將翰林院詹事府國子監官員每日輪四員入直南書房朕不時諮詢可以知其人之能否以備擢用○丁未以王燕爲湖北布政使趙世顯爲江蘇按察使由兩淮鹽運使○辛亥以張集爲兵部左侍郎管右侍郎事原任吏部左侍郎○子故

原任吏部尚書張士甄祭葬○癸丑戶部議覆江南江西總督傅拉塔奏鹽城高郵等處水涸田地求免徵糧應不准行上曰糧從地出此地尙爲水侵若徵錢糧則於民甚苦致治之道民爲最要凡事於民生有益卽宜行之此水浸之田皆令免徵錢糧○甲寅諭翰林院朕流覽載籍見分類諸書雖各有所長尙多未備唐類函可謂詳贍然唐以後典故藝文亦未採錄可依唐類函體例

自唐迄明輯成完書以資觀覽○丁巳 上巡幸畿甸閱視河隄

啟鑿○諭內大臣等扈從衛士魚貫而行無得踐踏民田著派侍

衛等嚴查○以常綬爲工部右侍郎嵩祝爲內閣學士

由護軍參領遷

○

戊午 上閱龍潭口新隄○己未 上閱化家口新隄倉場侍郎

常書奏曰新隄凡十二處緊要者不過四五處 皇上若必加徧

閱時當溽暑恐勞 聖躬 上曰朕軫念小民每罹水患特爲閱

隄觀稼而來雖屬煩勞朕固忘倦 上閱黃須口等處詳視良久

諭常書等曰此處決口水勢湍悍隄雖堅固中間猶覺稍低可令

增修於前面另築一小隄以弱水勢大隄方保無虞耳其八百戶

口王家甫口筐兒港口白駒廠口等薄弱之處咸令增修○庚申

上閱桃花口永安口李家口信艾口柳灘口等處新隄諭常書

等曰頃閱新隄一二處爾等以前途新隄與此相同請卽回鑾朕

以此處百姓困於水災惻然憫恤所築新隄若不徧閱朕心終未釋然故必周歷覽觀方令回棹今觀新築隄甚屬堅固此地百姓可免數年水災矣○壬戌 上還京師

閏五月戊辰諭大學士等古聖先賢所著訓詞於學者礪行之道讀書之法居官治民之事無不該備果能孳孳行之自有無窮之益又諭朕先慮翰林官壅滯故用數人於部院衙門所用數人學問皆優如有翰林缺出仍著開列升補○庚午 上御瀛臺試翰林官於豐澤園○辛未左都御史薩海以年老乞休允之○吏部議覆提督學政許汝霖奏教職訓迪士子責任甚重請將由監生授教職者改授州縣佐貳官應如所請教諭改縣丞用訓導改主簿用從之○癸酉諭大學士等初四日召試翰林官於豐澤園出理學真偽論此亦書籍所有成語能賜瓊見此輒大拂其意應擢

之字竟不擡寫不應用之語輒行妄用原任刑部尚書魏象樞亦係講道學之人先年吳逆叛時著議政王大臣議奏發兵魏象樞云此烏合之眾何須發兵昔舜誕敷文德舞干羽而有苗格今不煩用兵撫之自定與索額圖爭論成隙後十八年地震時魏象樞密奏速殺大學士索額圖則於 皇上無干矣朕曰凡事皆朕聽理與索額圖何關輕重道學之人果如是挾仇懷恨乎又李光地湯斌熊賜履皆講道學之人然而各不相合李光地曾授德格勒易經李光地請假回籍時朕召德格勒進內講易德格勒奏言李光地熟精兵務其意欲爲將軍提督 皇上若將李光地授一武職必能勝任反復爲李光地奏請爾時朕卽疑之德格勒又奏熊賜瓚所學甚劣非可用之人朕欲辨其真僞將德格勒熊賜瓚等考試湯斌見德格勒所作之文不禁大笑手持文章墮地向朕奏

云德格勒文甚不堪臣一時不能忍笑以致失儀既而湯斌出又向眾言我自有生以來未曾見有似此一番造謊者頃乃不得已而笑也使果係道學之人惟當以忠誠爲本豈有在人主之前作一等語退後又別作一等語者乎今湯斌雖故李光地德格勒見在也又能賜履所著道統一書王鴻緒奏請刊刻頒行學宮高士奇亦爲作序乞將此書刊布朕覽此書內過當處甚多凡書果好雖不刻自然流布否則雖刻何益道學之人又如此務虛名而事干瀆乎今將此等處不過諭爾等聞知朕惟以治天下國家之道存之於心此等人議論又何足較也○乙亥理藩院奏喀爾喀台吉車陵扎卜之父達本什士謝圖汗六扎薩克中之一扎薩克也因與滾濟斯扎卜遇噶爾丹之亂投入鄂羅斯今車陵扎卜收集其屬下六百餘人自鄂羅斯來歸應授爲扎薩克一等台吉其屬

下六百餘丁按例編爲四佐領從之○丁丑差諭噶爾丹侍郎滿不以噶爾丹疏回奏上賜噶爾丹敕曰朕承天命統御萬邦凡恭順者獎勵以示優恤若譎詐者亦必匡正其非使歸於善而止爾噶爾丹於烏蘭布通之地爲我兵所擊潰敗而走於時即可破爾矣朕軫念爾向來通貢不忍速滅不使窮迫停止各路進剿之兵遣內大臣吳丹等出使於爾爾在威靈佛前堅誓永不敢犯印文誓書猶在也朕謂爾不背盟許爾使照常往來待爾無異意此情已屢經敕諭不必一一悉數今閱爾奏欲依達賴喇嘛使人前所定之議請將澤卜尊丹巴胡土克圖土謝圖汗畀爾按爾前奏內有素澤卜尊丹巴胡土克圖土謝圖汗三言內以一言爲定將七旗發回故土已蒙許畀以澤卜尊丹巴胡土克圖土謝圖汗之語想此乃小人欲脫其身而爲此言爾果有此旨豈有不授爾敕

者乎執來歸之人以畀其讎可乎敕諭甚明何嘗不解爾奏內之言爾亦未嘗不解敕內之言然皆烏蘭布通戰前之事誓後不得復引以爲辭况爾違朕前旨及達賴喇嘛之令伐喀爾喀致喀爾喀等窮迫來降朕賜之銀米牲畜以爲養贍達賴喇嘛聞之甚喜奏言惠濟喀爾喀真如我佛慈悲噶爾丹者大君所當責而誅之者也而俯恤眾生有如赤子復加寬宥達賴喇嘛此奏前已並敕諭發爾矣卽安插喀爾喀之事亦敕爾知之矣儻爾噶爾丹爲喀爾喀所敗而來歸命朕亦當受而養之斷不擒以畀喀爾喀也此卽朕萬邦一體之意朕從來降敕與爾俱布至誠今爾不將馬迪被害之故回奏覆旨又將跪頂威靈佛之誓付之不論徒以使臣喇嘛爲辭又將達賴喇嘛與朕處置已畢之事屢屢翻覆包藏禍心以圖構覺道回子於內地爲奸宄偵探以此觀之則爾外奉宗

喀巴之法而實入回回之教不欲朕扶助宗喀巴並達賴喇嘛之法彰彰明矣爾所行之事蒙古皆知之反側如是朕已秣馬厲兵但視爾舉動耳爾又請沛如海之仁賜五六萬兩原諭謂近朕之前來請則加恩賚且許之互市爾皆不副朕旨豈有賜銀之理爾奏內又云扎木巴兒藏布言欲往西方我向不攔阻往西方之人夫扎木巴兒藏布者壞達賴喇嘛之教行事悖亂爾知而故留不卽發回是亦已矣至爾所遣回子奸細未識爾知而遣之抑爾種類中潛爲之也今已將爾使人所留奸細內顧爾馬哈穆特卽於爾地正法雖然爾厄魯特喀爾喀之事朕與達賴喇嘛始終教誨發敕遣使不少矣爾不依誓書索喀爾喀不已且又以不解我言語爲辭是雖發敕遣使終無了期朕反復思維不得不會閱以定之此會也遣他人亦終無用必須爾親來與朕面議方可定也且

以此情事敕諭達賴喇嘛爾如遵朕旨可速奏定會閱之日與期約之地其遣奏時須爾丹濟拉丹津俄木布兩人內遣一人來其他微賤之人不能洞曉如爾難於會閱則當如前誓不復及喀爾喀之事速誅害馬迪之人具奏請罪則仍許爾使往來互市如仍執迷不悟欲行詭譎則永絕爾貿易爾覆奏未到雖有使來亦不許入爾見來之使本當不許市易但回子事或者爾原不知故權使市易並前所留納秦和碩齊同遣出境達賴喇嘛處亦以此敕諭之矣今以諭爾敕書付爾使納木喀喇克巴喇木扎木巴諾顏和卓齋往○丙子翰林院奏兵部督捕左理事官熊賜瓚於瀛臺御試日所作文字內用 宗廟二字不據寫又妄用不應用之語顯係不敬應將熊賜瓚革職拏問得旨熊賜瓚係朕從優擢用乃不思圖報頃 御試時見理學真偽論題卽大拂其意於文內

應擡寫之字竟不擡寫不應用之語輒行妄用本當嚴加治罪姑念其愚蠢無知從寬免處分○庚辰內閣學士田喜霖以病乞休允之○刑部等衙門奏太監錢文才毆死民人徐二應絞監候上諭大學士等凡太監犯罪斷不可宥尤宜加等治罪朕觀古來太監良者少要在人主防微杜漸慎之於始苟其縱容姑息侵假事權迫其勢既張雖欲制之亦無如何如漢之十常侍唐之北司竊弄威權甚至人主起居服食皆爲所制此非一朝一夕之故由積漸使然也太監原屬陰類其性情與常人不同有年已衰老而言動尚若嬰兒外似謹厚中實叵測必人主英明此輩始無由弄權朕聞明代諸君將本章批答委之司禮監司禮監委之名下內監此輩素無學問不知義理委之以事其能免於舛謬耶錢文才此案爾等記之至秋審時勿令倖免○壬午以傅臘塔爲左都

御史由吏部左侍郎遷

○已丑調常書爲吏部右侍郎以德珠爲倉場侍

郎由內閣學士遷

六月丁酉朔以陶岱爲內閣學士

由內閣侍讀學士遷

○工部侍郎星安緣

事革職○戊戌諭大學士等江南江西總督居官善者自于成龍以來惟傅拉塔一人傅拉塔和而不流不畏權勢仰體朝廷委用之意愛恤軍民甚屬可嘉茲聞溘逝深爲憫惻著從優賜卹○辛丑以傅德爲盛京工部侍郎由左副都御史遷○授湖廣提督徐治都爲鎮平將軍仍管提督事○丙午以阿山爲左副都御史原任戶部侍郎陸榮爲內閣學士由左贊善遷○丙辰大學士等奏江南江西總督員缺九卿保舉吏部左侍郎布彥圖等十二人 上曰布彥圖先在理藩院內閣時猶能效力自任吏部所行甚穢聲名不堪朕以江南地方緊要欲得一端方之人命爾等大臣保舉似此等人亦皆舉

出爾大臣等意欲欺朕耶是誰所舉著問明具奏原任雲貴總督
今升左都御史范承勳行事堅定爲人平易著補授江南江西總
督令馳驛速赴新任○甲子添設山西右衛同知一○丙寅大學
士等覆奏侍郎布彥圖係吏部尙書熊賜履保舉 上問吏部尙
書庫勒納曰布彥圖與爾同旗同部其人果可保舉耶庫勒納奏
曰布彥圖品行穢惡非可保舉之人 上曰如是爾何不阻之爾
爲尙書當矢志忠誠勉圖效力如布彥圖之貪婪穢惡舉國共知
何得聽人妄行保舉庫勒納免冠謝罪 上曰自古漢人結爲黨
類各援引同黨之人以欺其上習以爲常滿洲素樸誠忠實今觀
旗員亦各自結黨其中子成龍最爲強勝此中惟尙書索諾和並
無黨類亦不往來大臣之家愿慤安分此外孰無黨者焉能欺朕
朕因布彥圖在理藩院時塞外效力漸升至侍郎不思圖報朕恩

所行貪婪穢惡朕甚惡之布彥圖著革去侍郎仍授爲理藩院員外主事之職服勞以愧之爾侍郎等不奮勉以副朕任用之恩如布彥圖者朕亦必加處分斷不寬貸也

東華錄

臣王先謙敬

臣周澗蕃恭校

秋七月丁卯朔以蔣宏道爲左都御史轉王士正爲戶部左侍郎

以王揆爲戶部右侍郎由內閣學士遷○己巳轉常書爲吏部左侍郎調

安布祿爲吏部右侍郎由兵右調○壬申諭大學士等文選司甚屬緊

要近聞文選司郎中劉始恢聲名頗劣可令休致先年文選司郎

中宋文運才雖平常而操守聲名甚好朕不次擢用洊至刑部侍

郎今文選司無一能及之者將朕旨傳諭吏部○予殉難福建巡

海道加贈工部侍郎陳啟泰浙江溫處道加贈通政使陳丹赤俱

追諡忠毅○巴圖爾額爾克濟農奏報祁齊克逃遁遣莽禁哈什

哈等追及之於耨爾格山諭之降不從莽禁哈什哈等與戰殺祁

齊克及同逃巴雅克海桑等報聞○甲戌以馬爾漢爲兵部右侍

郎由翰林院侍講學士遷

徐嘉炎爲內閣學士

由翰林院侍讀學士遷

○壬午兵部奏

建威將軍希福請將大同綠旗兵三千令總兵官率之與臣等同行又鑲藍旗蒙古旗分察哈爾兵近殺虎口居住其八旗察哈爾俱接壤而居丁壯整齊秋高馬肥請將伊等前鋒護軍驍騎酌量派發附各旗遣至臣等軍前 上諭大學士等綠旗兵若多發往則其馬少且邊外地方米糧何能運到朕前巡察邊外時曾帶古北口綠旗兵往沿途常賞賚食物贍養然去時猶可及觀其回時情形甚憊隨朕行走尙有苦累之處今希福亦能如此賞給乎希福每遇一事必生疑阻此番發往滿洲之兵已有八千有此兵力所向無敵將軍費揚古勳舊大臣今駐防歸化城眾皆稱贊軍士亦皆心服都統郎談邊外行走熟練於此無不能辦者若又遣希

福往或至疑阻大事亦未可定此處關係甚大希福著停其前往
右衛新駐兵丁令希福料理大同綠旗兵丁不必多發著大同總
兵官康調元親選五百名與將軍費揚古一同前往至京城兵亦
已豫備察哈爾兵尚有緊要差遣卽與所備之兵一同調遣不必
發往○甲申 上幸湯泉○丙戌 上還宮○丁亥 上命大學
士等於翰林官員內知有長於文章學問超卓者具奏大學士等
奏曰徐乾學王鴻緒高士奇韓菼文章詩賦頗爲優長又進士唐
孫華長於詩賦文章不佳 上召唐孫華考試諭大學士等覲唐
孫華文學實優但字不甚佳著額外授爲禮部主事令於翰林院
行走大學士等奏曰 三朝國史典訓一統志明史尙未成書徐
乾學王鴻緒高士奇韓菼等在籍皆文章素優之人若召令各纂
一書書可速成 上曰徐乾學等著來京修書徐乾學之弟徐秉

義學問亦優並著來京韓莛原係內閣學士告假回籍不便與曾經處分之人一體取來修書著以原官召取來京○己丑贈故江南江西總督傅拉塔太子太保給拜他喇布勒哈番世職祭葬加祭一次諡清端○庚寅 上巡幸邊塞啟鑾

八月己亥諭領侍衛內大臣等前聞噶爾丹來侵根敦戴青是以調郎談等兵右衛兵歸化城兵令費揚古統之防備土喇乃尙書班迪等至今無報似乎無事今時漸寒兵士前進殊爲勞苦又聞噶爾丹有趨歸化城之意雖未實回師防歸化城爲是可令右衛兵回右衛歸化城兵郎談兵俱回歸化城各秣馬設備大同總兵官康調元亦率其兵回大同趙良棟之來已近京城且令入覲而歸阿喇尼滿丕暫在歸化城偵探此事令喇嘛商南多爾濟郎中奔墾自此地馳驛前去伊等未到之前如土喇有警將軍等仍便

宜行事亦令商南多爾濟等爲之探聽○甲辰兵部議覆四川陝西總督佛倫奏臣前奏請復黃城爾舊城安設弁兵控扼雪山稽察往來奸宄奉旨會同提督確議具奏今據甘肅提督孫思克等咨云黃城爾地方偏近雪山天氣寒冷難於耕種糧草無出修築城垣工程浩大應請停止至於大黃山大草灘之要路在大馬營地方原設守備兵力單薄應將守備裁去改設遊擊千總把總各一馬步兵五百名駐守大馬營仍令永固城副將兼轄肅州總兵官統轄並於大阿博敦東西築墩臺撥兵瞭望其唐家沙溝應令永昌副將派千把總各一統領馬步兵輪流駐防至北邊硤口等處亦應添設把總一馬步三千名駐紮定羌廟令硤口守備管轄俱應如所請從之○喀爾喀台吉恭額薩木頻等率眾來歸○丁未設雲南省曲靖江廣西元江開化順甯武定景東八府學尋

甸建水新興趙州劍州昆明宜良楚雄定遠保山和曲祿勸雲州
姚州河陽南甯新平十七州縣學訓導各一○己未 上駐蹕拜
巴哈昂阿賜喀爾喀澤卜尊丹巴胡土克圖等冠服蟒段等物有
差

九月己巳撤郎談等兵還京師○廣八旗入學額○癸酉 上駐
蹕喇嘛洞賜喀喇沁多羅杜楞郡王扎什等纓冠銀幣○尙書班
迪等奏臣等遵旨遣筆帖式巴查爾撥什庫丹巴同澤卜尊丹巴
胡土克圖土謝圖汗之使人並西卜退哈灘巴圖爾納木扎爾陀
音等十人往覓和托輝特根敦戴青所在至色梭額之英格特布
哈地方見之告以臣等前去之故根敦戴青隨卽內徙而來至俄
爾洪圖喇之白爾齊爾與臣等相見臣等傳旨諭之根敦戴青曰
我等爲厄特兵閒阻屬下之人離散者多不能赴闕請 皇上萬

安今蒙四大臣宣示 恩綸不勝懼忭願卽與諸大臣入覲屬下

之人賴採捕野獸爲生惟伊魯諸處頗有野獸請安插伊魯諸處

臣等允其所請將伊所屬七百餘戶四台吉及千餘弓箭手共三

千餘口遷至伊魯等處安插隨令俄齊爾杜喇爾同根敦戴青起

行赴京尋根敦戴青入覲 上加恩賜授爲扎薩克多羅貝勒○

己卯 上還京師○辛巳以黨愛爲陝西布政使由甘肅按察使遷○壬

午停雲南鼓鑄從巡撫王繼文請也○癸未戶部奏盛京戶部侍

郎阿喇彌將山東運去之米不行均給兵丁又將岫巖地方應料

理支給之米不親行料理應降五級調用 上曰阿喇彌自簡任

侍郎以來並不勤勞效力凡事瞻徇情面枝梧塞責甚屬庸懦盛

京官員兵丁無一人稱其好者著革職同伊家口發往黑龍江披

甲效力○以王繼文爲雲南貴州總督石文晟爲雲南巡撫由貴州布

遷政使

○甲申遣大臣察賑直隸災民並八旗貧戶○乙酉九卿議

奏革職陝西巡撫布喀身任封疆於甘肅巡撫任內並不遵旨運糧以濟兵民將甯夏等處見運之糧停止擅動西安所屬長武等州縣之糧私行輓運又以遲誤之罪卸諉他人罔恤軍民乏食貽誤邊疆重事應將布喀議斬立決其布喀所參巡撫吳赫將伊誣陷係吳赫參後布喀仇參應無庸議得旨布喀著改爲應斬監候秋後處決餘依議○巴圖爾額爾克濟農奏前者鄂齊爾圖汗時臣曾進貢往來自噶爾丹執鄂齊爾圖汗臣率族眾居青海數年後歸 聖化蒙恩不可勝計曾兩次遣使中途遇害俱不得達臣之族類困窮已極臣今願往指授地方編爲參領佐領馳驅效力得旨巴圖爾額爾克濟農甚爲可憫但達賴喇嘛奏請安插於彼青海地方姑允其說見今達賴喇嘛有使人至俟使至日當另有

旨○丁亥 上御經筵○戊子以曩吉里爲甘肅按察使由郎中遷○

庚寅以帕海爲盛京戶部侍郎由盛京工部理事官遷○是月免山東邱縣

水災額賦

冬十月丙申以吳赫爲四川陝西總督黨愛爲陝西巡撫由布政使遷

○以達禮爲貴州布政使由按察使遷○己亥復設江南淮安清江廠

船政同知改江甯廠船政歸江甯管糧同知兼理○庚子諭大學

士等天下武舉會試者或其人材可用騎射亦優而以不合式之

故遺而不錄者有之朕意殊爲憫惜令兵部宣示有願效力者與

再試者具呈候該部請旨再行考試遴選交火器營令其服習戎

事於會試時照常考校旣晰知其人亦便於拔取有超羣者卽予

錄用如此則人材不至遺棄於考試良有裨益矣○諭朕聞奉旨

遣往各省大臣官員沿途文官朝服武官介冑以迎之此皆未當

於理著禁止○辛丑賜曹日璋等九十六人武進士及第出身有

差○癸卯 上幸南苑行圍○以王維珍爲浙江巡撫轉張集爲

兵部左侍郎以張鵬翮爲兵部右侍郎

出浙江巡撫

○以禪卜爲陝西

布政使

由御史遷

○丙午

上大閱於玉泉山○戊申

上還宮○庚

戌以任風厚爲貴州按察使

由福建禮道遷

○甲寅九卿議覆河道總督

于成龍奏高家堰等處隄工所關甚鉅土隄易爲水勢衝壞請改

建石隄以爲永久之計並請於近隄開一小河運送工料臣等公

議准行

上曰修此隄工所需之石從何處取辦應用此隄關繫

緊要必須修築堅固方可無虞朕聞洪澤湖昔日俱民田因高家

堰築隄淮水泛溢遂爾成湖彼時之民未必不怨今高家堰隄理

應修固但需用石料浩繁若運辦不得法恐致累民雖動正項錢

糧給價募雇然地遠工繁或仍派於民減給工價亦未可定朕前

南巡親覽此隄極爲緊要惟恐擾民故爾躊躇必詳悉籌畫方可
舉行至開運料小河九卿所議殊未明白河道關係甚大朕從十
五歲卽爲河道憂慮今欲開小河必指高家堰相近之處往年靳
輔在時亦欲於高家堰另築一隄於中濬小河令從兩隄間通流
運送工料以兩隄之間浚河則舊隄兩面爲水衝盪議不准行今
于成龍請開運料小河卽靳輔欲開小河之處若將此開濬勢必
引入洪澤湖之水浸潤衝刷兼之湖水泛溢河水盈漲高家堰斷
不能保况修隄土石並非高郵等處所出與其於小河以小船載
運何如卽由洪澤湖以商賈大船載運此本著另議具奏尋九卿
議覆高家堰等處改建石隄爲永久計應如所請速行建造其開
運料小河必致引入洪澤湖之水衝激高家堰隄工應不准行從
之○丙辰命通州坐糧廳監督以三年爲滿從倉場侍郎德珠等

請也○丁巳內閣學士達虎以病乞休允之○癸亥予故雲南貴州總督丁思孔祭葬

十一月丁卯 貴妃鈕祜盧氏薨諡溫僖○癸酉侍郎安祿布常

綬等奏臣等遵旨查直隸安州等十一州縣貧民十萬餘口應賑

米四萬餘石 上諭大學士等朕思直隸米價騰貴小民艱苦若

僅照數給米仍恐無益著將此米一半散給百姓一半照目前米

價折銀給與貧民所餘之米著視時價減糶則百姓既得銀兩而

糶米又易庶民霑實惠其安州等十一州縣康熙三十四年地丁

錢糧盡行蠲免又諭密雲順義附近地方今年米穀未收除常平

倉米穀平價照常糶賣外並將前轉運積貯之米每月發千石平

價糶之遣戶部賢能司官各一員監視糶賣○丙子以勒德爲內

閣學士由郎中遷○戊寅以陳廷敬爲戶部尙書原任刑部尙書○溫僖貴妃

喪事停殯於朝陽門外鑲黃旗滿洲都統公阿靈阿舉家男婦守
孝而阿靈阿與其妻長兄法喀素不相睦必欲致之死地乃造言
其兄法喀與其三兄福保之妻踰垣調誘欲行姦污以此播揚於
眾法喀奏聞 上洞悉阿靈阿之奸偽面加誠飭阿靈阿兇毒益
甚堅執前說 上震怒將阿靈阿革去都統並所襲一等公○癸
未 上謁 陵啟鑿○移江南鳳陽關監督駐正陽關○丁亥
上謁 暫安奉殿 孝陵至 仁孝皇后 孝昭皇后 孝懿皇
后陵奠酒

十二月己亥 上復謁 暫安奉殿 孝陵○甲辰 上還宮○
丁未理藩院奏前鄂爾多斯貝勒達爾札故其子應不准承襲貝
勒 上諭大學士等達爾札凡事誠心效力奮勇行間病篤時將
伊旗人齊集於朕差往御醫之前強起望闕叩首徧屬眾人曰朝

廷憐惜我等甚深汝等毋違我意善報 皇上宏恩忠義可嘉伊

子旺束克著仍襲多羅貝勒○轉田雯爲刑部左侍郎以陳汝器

爲刑部右侍郎

由大理寺卿遷

○庚戌諭大學士等朕覽福建浙江總督

朱宏祚大計疏內有閩省地瘠民飢之語豈福建全省之人盡皆

佻薄乎原任四川巡撫張德地署理延綏巡撫時曾奏延安邊地

並無可舉博學宏詞之人原任少詹事邵遠平奏南方之人皆輕

浮不可用朕思賢才不擇地而生雖深山僻地豈無人才至於南

方之人豈盡皆輕浮不可用者二人所言甚不愜於朕心因皆罷

斥今朱宏祚又以此等謬言陳奏殊屬不合著該部察議具奏尋

部議朱宏祚應降四級調用從之○壬子諭大學士等武官品級

比文官品級甚大武官於行閒效力果有功績品級自宜從優今

武官品級太過宜作何裁定爾等查議具奏○吏部奏阿靈阿緣

事革退都統併公爵其一等公應令阿靈阿子朝昆襲替得旨阿
靈阿著畱一等公○乙卯 上幸南苑行圍○庚申 上還宮○
是歲朝鮮來貢○人丁戶口二千三十七萬六百五十四田地山
蕩畦地五百九十七萬五千二百六十八頃五十四畝有奇徵銀
二千七百三十九萬五百六十二兩有奇米豆麥六百九十六萬
五千三十二石有奇草二百八萬一千五百四十二束茶十五萬
七千四百五十三引行鹽四百三十一萬九千三百四十引徵課
銀二百六十九萬五千二百八十二兩有奇鑄錢二萬三千六百
五十三萬六千五百五十有奇

東華錄

康熙五十五

臣王先謙敬編

臣周澗蕃恭校

康熙三十四年乙亥春正月戊寅諭大學士等興永朝前請丈量
湖南田地有累於民否治國之道莫要於安民或有不肖州縣官
將田地竟未行文量而輒稱餘田加賦者亦未可定安有加增田
賦而全不累民之理此事著湖廣總督吳瑛詳察具奏○乙酉諭
兵部朕巡視京畿見綠旗兵沿途奔走無頃刻之暇甚屬勞苦深
爲可憫問之則云兵部內私用印信文移護送家口等事甚多除
已往之事不復察究自後爾部移文各處總兵官將派出兵丁護
送大臣官員事件數目年終詳明造冊送爾部察奏○諭直隸山
東河南山西陝西江南巡撫導民及時耕田令土瘠蝗種毋致成

患○辛卯 上幸湯泉

二月丁酉 上還宮○戊戌諭大學士等近觀言官奏事或受人屬託或懷私賣本所奏之事俱非無故如原任侍郎鄭重有門生曾任陝西縣令爲總督佛倫奏參遂轉屬彭鵬將陝西全省官員俱行參奏豈有因一人之仇遂參全省官員之理凡任言官者但宜將關繫國家得失生民休戚之事從直陳奏豈可受人屬託懷私挾仇賄賣本章而條奏乎如有此等之人必盡察出正法斷斷不恕○己亥以郭世隆爲浙江福建總督由直隸巡撫遷○癸卯予故原任文華殿大學士李之芳祭葬諡文襄○甲辰大學士等以翰林院撰原任福建巡海道殉難追贈工部右侍郎陳啟泰碑文呈覽上曰陳啟泰殉節與他人不同觀其闔家之人逐一自盡畢伊然後自縊而死甚屬慘傷海賊進城見其家棺槨如許亦爲垂淚

伊子陳汝器被海賊拏獲後方得出應將此等事俱行撰入觀此

碑文詞意尚未詳盡爾等可查明另撰○丁未以沈朝聘爲直隸

巡撫由守道遷王國泰爲廣東按察使由山西河東道遷○乙卯厄魯特噶爾

丹遣使他西蘭和卓請安入貢奏言 皇帝敕諭賜物不勝權忤

文內深意雖不盡曉奉有是則加恩非亦曲宥之旨始敢以後先

情事歷爲上陳使臣馬迪被害之事不獲詳知難於覆奏扎木巴

爾臧布胡土克圖早已遁去所云約地會盟之事未便擅定俟後

再行奏聞欲遣丹津俄木布丹濟拉往覲所需貲力多則倉卒難

辦少則爲路甚遙是以陳情上奏回子所行之事實不知情伏念

皇帝恩養四十九旗蒙古及四厄魯特不啻赤子是以咸享安

樂柰澤卜尊丹巴及土謝圖汗二人背 皇帝之旨藐宗喀巴之

法與達賴喇嘛之教以致諸蒙古盡皆敗壞請將喀爾喀七旗發

回故土澤卜尊丹巴及土謝圖汗二人亦仍照前奏奏上 上賜
敕諭噶爾丹曰去歲諭爾敕內諸凡開示甚晰朕俯念中外咸在
懷抱爾厄魯特與喀爾喀讐殺相尋日無甯息心實傷之且思爾
等皆職貢之國朕一概秉公舉無偏庇後喀爾喀窮迫來歸朕乃
收撫以全其生命此亦朕矜恤羣生之至意也爾噶爾丹不遵朕
言亦自失其生理而已於我四十九旗蒙古何敗壞之有今爾縱
戕害使臣馬迪之人不正法請罪乃巧飾誑奏是爾違朕之旨迷
惑回子之教壞宗喀巴與達賴喇嘛之法明甚朕是以遣回爾使
不令進邊嗣後若仍怙非不悛蔑視前諭爾永勿上奏遣使貿易
特諭○丁巳興太和殿工○庚申以舒樹爲甘肅巡撫由山西布政使遷
○兵部等衙門議覆更定武職官員品級除參將遊擊大員品級
仍照舊例不改外其掌印都司管屯都司僉書都司僉書署都司

僉書四項俱升遊擊應皆改授正四品守備改正五品守禦所千總改正五品衛千總改正六品營千總改從六品其見任者仍照原品從之

三月癸亥諭大學士等翰林院撰擬文章是其專任善與不善皆應有鼓勵懲戒之處自是以後凡碑文祭文其撰擬人姓名及所撰之文或經俞允或被申飭一一記名有三次善有三次不善俱行奏聞○予故刑部左侍郎鳴世圖祭葬○丁卯以席密圖爲左副都御史由光祿寺卿遷○辛未諭大學士等趙良棟奏訴其效力行間

爲同時出征將軍章泰賴塔穆占郎談等黨同隱蔽其勞績且自言各處立功甚多並未議敘與趙良棟同時出兵將軍等俱已物故此皆無證之言又稱明珠前差往鄂爾多斯過甯夏時伊曾將效力之處求爲轉奏亦被隱蔽明珠同時曾將趙良棟之言悉行

陳奏可曉諭趙良棟知之彼又將佛倫非毀因加張勇侯爵亦行忌嫉觀此趙良棟乃暴戾褊隘之人也當時大兵自湖廣中路進克岳州又攻取陝西平涼恢復廣東福建等省皆與趙良棟絲毫無涉朕惟欲保全功臣但從寬大此本可發還趙良棟止將彼效力陳奏處該部議敘可也○癸酉以甘度爲山西布政使由郎中遷○庚辰 上幸南苑行圍○己丑 上還宮○予故左副都御史沙哈禮祭葬○是月免山西河津榮河二縣水災額賦福建閩清等三縣上年水災額賦有差

夏四月庚子理藩院奏達賴喇嘛及第巴皆遣使奏請勿革噶爾丹策妄阿喇布坦汗號並加恩賜敕印其西海等處一帶地方所置戍兵請撤回 上諭大學士等第巴乃外藩人何敢奏請撤我朝兵戍此特爲噶爾丹計耳我之守戍乃以噶爾丹闌入吾土之

故向者噶爾丹敗已將就擒因彼之濟隆胡土克圖來言噶爾丹乞降始得亡命今噶爾丹仍索喀爾喀未已則我朝既不當罷戍亦且當備師如噶爾丹來卽行剿滅儻悔過乞降亦無有不撫之理爾等可會同理藩院侍郎滿丕備檄曉諭達賴喇嘛及第巴知之○癸卯理藩院奏喀爾喀台吉車臣吳爾占以噶爾丹情形來報曰去年噶爾丹居於孔圭濟達渾耕於烏闌昆收歛各半其弓箭手千餘人稍有駝馬絕無牛羊掘土中所產物以食杜噶爾阿喇布坦居於察罕色渾耕於扎巴罕哈薩克圖亦收成一半其生計稍勝噶爾丹策妄阿喇布坦尙未與噶爾丹通使伊拉古克三胡土克圖仍在噶爾丹處並無舉動聲息去歲八月閒聞京師發兵往赴根敦戴青彼以爲率之來討故集民爲備置哨偵探迨後無聲信始撤回哨卒報聞○甲辰遣御史鍾申保內齊陀音胡

土克圖齋敕往召班禪胡土克圖○己酉兵部議敘勇略將軍趙良棟應給與三等精奇尼哈番趙良棟具疏辭 上曰趙良棟以所給職小故爾控辭昔大兵恢復雲南時大將軍賴塔等領兵從廣西進大敗黃草壩石門坎之賊直抵雲南省城大將軍章泰領兵從貴州入沿途殺敗賊眾亦抵雲南省城城中之寇出戰於歸化寺大敗之遂圍雲南趙良棟雖後至其首先倡議大兵進川及取得勝橋有功著該部一併再議具奏尋部議應授爲二等精奇尼哈番得旨趙良棟授爲一等精奇尼哈番○乙卯諭大學士等河南巡撫顧汧居官平常著降二級調用○丙辰諭戶部頃山西巡撫噶爾圖等奏報四月初六日平陽府地震房舍倒塌人民損傷隨經特遣司官星馳前往察勘情形比復傳問往來經過及本籍人員俱述屋宇盡皆傾毀人口多被傷斃受災甚重朕心深切

軫惻應作何恩卹著速議奏諭大學士等平陽府如此災沴或政
事有應行應革者可傳集九卿問之其平陽府屬見任京官之人
欲歸視家室者不行開缺給假往視○丁巳 上幸南苑行圍○

己未以李輝祖爲河南巡撫

由大理寺卿遷

○諭大學士等聞外藩扎薩

克人等或有私隨我朝遣赴達賴喇嘛處之使臣而去者或有同
達賴喇嘛使人前來不返故土竟自畱於歸化城各扎薩克處者
噶爾丹乃狡詐之人其各處安插奸細偵探聲息之事顯然敗露
猶自不服巧飾上奏或令其屬下喇嘛潛隨達賴喇嘛之使人前
來偵探反間亦未可定嗣後宜嚴加禁止○理藩院議覆達賴喇
嘛來使所帶之人宜永行禁止不許存畱 上諭侍郎滿丕等達
賴喇嘛來使所帶之人若概行禁止則外藩蒙古不得私行貿易
其心不服達賴喇嘛之人往來已久不必限定來使所帶人數但

來人有達賴喇嘛印信者納之如無印信則非係達賴喇嘛之人卽不納如此議定則不禁而自絕蒙古亦皆心服矣尋理藩院議覆達賴喇嘛及諸扎薩克之往來使人令其各給與符驗從之○辛酉予故原任甘肅巡撫嚴泰祭葬

五月壬戌朔奉差賑濟山西平陽等處尙書馬齊請訓 上諭爾傳諭巡撫噶爾圖平陽等處地震房舍倒壞人民壓斃伊應親身於彼處設廠居住將被災百姓救護候朕諭旨乃遽回省城殊屬不合除噶爾圖所奏外有地震重處爾可詳察閱視加恩賑給本年應徵錢糧停其徵收爾到彼處卽曉諭眾民皇上爲爾百姓深切軫念特遣大臣賑救爾眾民毋妄遷徙離散且恐因地震地方不良之人及鎮標兵丁借端搶奪擾害生民傳諭總兵官周復興親身率領官兵將此一帶地方善爲防護其平陽府洪洞縣被災

百姓爾會同巡撫噶爾圖親身往彼處賑濟務令均霑實惠○乙丑諭大學士等朕一聞平陽地震深切軫念卽遣官馳驛察勘被災情形隨頒諭旨令該部速議恩恤又特遣大臣前往賑濟停徵錢糧噶爾圖身爲地方大吏與百姓誼同休戚乃目擊災傷不候賑濟大臣會同詳加籌畫親行賑濟竟遽爾回省殊屬溺職著嚴察議處具奏尋吏部議噶爾圖應革職交刑部得旨噶爾圖著革職免交刑部○辛未諭大學士等覽八旗都統所察無房舍者七千有餘人未爲甚多京師內城之地大臣庶官富家每造房舍輒兼數十貧人之產是以地漸狹隘若復斂取房舍以給無者譬如剝肉補瘡其何益之有貧乏兵丁儼屋以居節省所食錢糧以償房租度日必致艱難今可按各旗方位每旗各造屋二千間無屋兵丁每名給以二間於生計良有所益此屋令毋得擅鬻兵丁亡

退者則收入官大略計之約費三十餘萬金譬之國家建一大宮室耳敕下欽天監相視汝等及八旗都統身往驗看宜建造之處奏聞○壬申 上巡視新河及海口運道啟鑿至通州崔家樓登

舟○乙亥 上閱竇家口隄岸以應加增築處指示巡撫沈朝聘

總兵李鎮鼎等○戊寅 上閱視海口命於其處立海神廟○戊

子 上還宮○己丑添設盛京刑部蒙古員外郎一○以山東布

政使喻成龍爲太常寺卿○庚寅以盛京旱遣侍郎朱都納等發

倉平糶並給兵食○以李枏爲工部右侍郎

由內閣學士遷

六月乙未以溫保爲山西巡撫

由內閣學士遷

張霖爲安徽按察使

由陝西驛

傳道○遣官往平陽修築城垣衙署倉庫○丁酉冊石氏爲 皇

太子允禩妃○己亥免歸化城土默特歲貢石青等物○庚子以

京師久雨詔廷臣言事○辛丑以王道熙爲山東布政使

由江西按察使

遷

○壬寅以額赫禮齊稽俱爲內閣學士

額赫禮由內閣侍讀學士齊稽由兵部督捕理

事官

○癸卯命禮部祈晴○甲辰以張榕端爲內閣學士

由祭酒遷

戊申 皇子允祿生○辛亥盛京刑部侍郎佛葆緣事降調○乙

卯以孫居湜爲江西按察使

由河南府知府遷

○丙辰內閣學士陸萊以

病乞休允之○己未以額赫禮爲盛京刑部侍郎

由內閣學士遷

○庚申

漕運總督王樑奏參贛州衛千總楊奉等於漕船裝帶商人貨物

上曰王樑將漕船所載貨盡行搜出棄置沿河兩岸所行甚暴

從來總漕未嘗禁漕船帶貨而漕運並未遲誤今王樑禁止帶貨

而漕運遲誤至今尙未到裝帶些微貨物於事何妨王樑不但暴

戾凡事執拗宜令解任○諭大學士等茲後世職若以罪革斥其

子勿准承襲令同父昆弟襲之無同父昆弟者則宜削其職其下

吏部定例以聞尋吏部遵旨議覆凡獲罪革職者不准其子孫承

襲應與其親兄弟及親兄弟之子孫承襲如無親兄弟及親兄弟
之子孫將其職銷去從之